



## Approvà cunvegna ANR/LQ

■ (cp) Il cussegl da fundaziun da l'Agentura da Novitads Ruman-tscha (ANR), sut il presidi da *Jon Domenic Parolini*, ha a chaschun da sia sesida dals 16 avrigl 2009 approvà unanimamain la cunvegna areguard la collavuraziun ANR/La Quotidiana (LQ). En connex cun questa collavuraziun surprena l'ANR ils collavuradors da LQ d'enfin qua *Giusep Venzin*, *Gieri Antoni Caviezel* sco era in pensum parzial dad *Andreas Cadonau* per il 1. da matg 2009.

Totalmain ha l'ANR uss 815 pertschient plazzas da lavur da las redacturas e redactors ch'èn staziunads a Ftan, Zernez, Cunter, Sur, Mustér, Cumpadials, Trun, Vuorz, Cuir sco era ad Uznach e Berna. Ultra da quai survegn la Pagina da Surmeir in sustegn annual direct da 100 000 francs sco indemnizaziun per lur prestaziuns schurnalisticas. L'ANR metta quels artitgels a disposiziun a tuts ses clients.

Enpli ha il cussegl da fundaziun da l'ANR approvà unanimamain tant il quint annual sco era il rapport annual 2008. Cun expensas e sortidas da radund 1 050 000 francs serra il quint annual cun in surpli da 18 000 francs. Sco ch'ins po leger en il rapport annual 2008 ha l'ANR puspè pudì augmentar marcantamain la producziun en cumparegliaziun cun ils onns precedents.

L'ANR è vegnida fundada dal 1996 cun la finamira da sustegnair ils meds da massa rumantschs. Ses servetschs èn ina mesira impurtanta per mantegnair e promover la lingua rumantscha. L'ANR è ina agentura da novitads independenta dals mediums, als quals ella furnescha ils texts, e vegn finanziada cun contribuziuns chantunalas e federalas. Ella furnescha a las gasettas rumantschas «La Quotidiana», «La Pagina Surmeir», «Posta Ladina» ed a la «Engadiner Wochenzeitung», sco era als mediums electronics rumantschs mintga di texts e fotografias.